

Konvensyen Memperkukuhkan Pemikiran Ahli Sunnah Wal Jama'ah
(ASWJ)

25 Ogos 2020 (Selasa)

Auditorium Dahlia, Dewan Syarahan dan Muzakarah Islam,
Masjid Sultan Salahuddin Abdul Aziz Shah, Shah Alam

Sejarah Kemunculan Teori dan Perkembangan Ahli Sunnah Wal Jamaah

Disediakan oleh:

Dr. Abdullaah Jalil

Universiti Sains Islam Malaysia (USIMI)

Anjuran:

Jabatan Agama Islam Selangor (JAIS)

ISI KANDUNGAN

PENDAHULUAN	1
Perpecahan Umat dan Panduan Rasulullah ﷺ.....	3
Umat Rasulullah ﷺ Umat Terpelihara Pada Kesepakatan Mereka.....	3
Perkhabaran Rasulullah ﷺ Tentang Kemunculan Fitnah.....	4
Lelaki Khawarij Yang Menjadi Punca Pertelingkahan Umat	4
Agamawan Yang Membawa Fahaman Takfir	4
Khawarij Akhir Zaman	5
PERGOLAKAN AWAL UMAT DI ERA KHULAFAH' RASHIDIN.....	6
Era Khilafah Saidina Abu Bakar r.a.	6
Era Khilafah Saidina 'Umar r.a.	6
Kesyahidan Saidina 'Umar Al-Khattab ؓ: Terbukanya Pintu Fitnah.....	7
Khilafah Saidina Uthman ؓ	7
Kemunculan Abdullah Bin Saba'	7
Pembunuhan Saidina 'Uthman ؓ: Al-Fitnah Al-'Ula.....	8
Khilafah Saidina 'Ali r.a.	8
Peperangan Jamal.....	9
Peperangan Siffin	10
Penubuhan Majlis Tahkim	11
Fitnah Abdullah Bin Saba'	11
Kemunculan Khawarij Haruriyyah	11
Keputusan Majlis Tahkim.....	12
Peperangan Saidina 'Ali r.a. dengan Khawarij.....	12
Pembunuhan Saidina 'Ali r.a.	12
Khilafah Saidina Al-Hasan r.a.	12
PERPECAHAN UMAT DENGAN KEMUNCULAN KELOMPOK BID'AH YANG TERAWAL DI AKHIR ZAMAN PARA SAHABAT	13
Kemunculan Golongan Khawarij (Haruriyyah) – Kelompok Bid'ah Pertama dan Peperangan Nahrawan.....	13
Kemunculan Golongan Syiah	14
Fitnah Karbala' dan Pembunuhan Saidina al-Husayn r.a. (w.61H)	15
Kemunculan Qadariyyah (Sekitar 99H)	15
Kemunculan Murji'ah	15
Kemunculan al-Mu'attilah dan al-Jahmiyyah (w.128H)	16
Kemunculan Jabariyyah.....	16
Kemunculan Mushabbihah, Mujassimmah dan Hashwiyyah.....	17
Fitnah Muktazilah (Al-Wasiliyyah).....	17
Fitnah “Kalam” (<i>Mihnah Khalq al-Qur'an</i>) oleh Muktazilah	18
Keteguhan Imam Ahmad Bin Hanbal.....	18

Khalifah Al-Mutawakkil Pada 232H Memadam Fitnah Khalq Al-Qur'an	18
Kemunculan Najjariyyah	19
Kemunculan Karramiyyah Dan Fitnahnya Melanda Mazhab Hanbali (w.255h)	19
KELAHIRAN MADRASAH KULLABIYYAH DAN AL-MUHASIBIYYAH SEBELUM DUA TOKOH BESAR ASWJ	21
Latar belakang Imam Ibnu al-Kullab (241H)	21
Latar belakang Imam Harith al-Muhasibi (170H-243H).....	21
KEMUNCULAN DUA TOKOH BESAR ASWJ	22
Kemunculan Imam Abu al-Hasan al-Ash'ari (260H – 324H) Sebagai Imam Ahli Sunnah dan Jama'ah.....	22
Kemunculan Imam Abu Mansur al-Maturidi al-Ansari (233-247H – 333H) Sebagai Imam Ahli Sunnah dan Jama'ah	22
ULAMA' EMPAT MAZHAB FIQH UTAMA SUNNI DAN TOKOH ULAMA' DALAM SEGENAP BIDANG SEBAGAI KESINAMBUNGAN MANHAJ ASWJ AL-ASHA'IRAH DAN AL-MATURIDIYYAH	24
Al-'Asha'irah adalah Ilmuan Islam Sepanjang Zaman dalam Segenap Bidang Ilmu Islam.....	25
Al-Ashairah dan al-Maturidiah adalah Jaguh Para Ulama' dalam Semua Disiplin Ilmu-ilmu Islam	25
Ulama' Empat Mazhab adalah ASWJ Al-Asha'irah dan Al-Maturiddiyah	26
Siapakah Ahli Sunnah dan Jama'ah kalau bukan Al-Asha'irah dan Al-Maturidiyyah?	27
KESINAMBUNGAN MANHAJ ASWJ DI MALAYSIA	27
Wasiat Syeikh Abdullah Fahim bin Syeikh Ibrahim (1869M – 1961M) Berkenaan Manhaj ASWJ di Malaysia.....	27
Tan Sri Dato' Haji Othman Bin Mustapha– Ketua Pengarah JAKIM	28
Jawatankuasa Fatwa Negeri Sembilan (2016).....	29
RUMUSAN.....	29
BIBLIOGRAFI	30

PENDAHULUAN

Ahli Sunnah dan Jama'ah (ASWJ) adalah satu istilah yang penting di dalam masyarakat Islam sejak hampir seribu tahun lalu kerana istilah ini melambangkan kebenaran pemiliknya dalam beragama. Kedudukan ASWJ sebagai pegangan majoriti para ulama' dan umat Islam adalah begitu jelas di dalam perkembangan ilmu-ilmu Islam dengan kemunculan tokoh-tokohnya yang muktabar dan kitab-kitabnya yang masyhur. Kedudukan para ulama' Al-Asha'irah dan Al-Maturidiyyah sebagai dua tunggak bagi disiplin aqidah/teologi ASWJ telah diperakui sejak kemunculannya sehingga hari ini. Walaupun kerangka ASWJ dari sudut manhaj, mazhab dan peranan merangkumi pelbagai kategori para ulama' [Rujuk Gambarajah 1], namun secara khususnya ia merujuk kepada Al-Asha'irah dan Al-Maturidiyyah.

Ini adalah kerana peranan mereka yang paling utama dan signifikan di dalam mempertahankan aqidah yang benar dan menolak syubhat-syubhat golongan yang menyeleweng. Al-Asha'irah dan Al-Maturidiyyah tidak mencipta aqidah yang baharu, tetapi mereka menetapkan aqidah yang menjadi pegangan Rasulullah ﷺ dan para sahabat baginda. Imam Taj al-Din al-Subki (771H) menyebut:

اعْلَمَ أَنَّ أَبَا الْحَسَنِ لَمْ يَبْدَعْ رَأْيًا وَلَمْ يَنْشِ مَذْهَبًا وَإِنَّمَا هُوَ مُقَرَّرٌ لِمَذَاهِبِ السَّلَفِ مُنَاضِلٌ عَمَّا كَانَتْ عَلَيْهِ صَحَابَةُ رَسُولِ اللَّهِ صَلَّى اللَّهُ عَلَيْهِ وَسَلَّمَ فَالانتساب إِلَيْهِ إِنَّمَا هُوَ بِاعْتِبَارِ أَنَّهُ عَقَدَ عَلَى طَرِيقِ السَّلَفِ نِطَاقًا وَتَمَسَكَ بِهِ وَأَقَامَ الْحُجَجَ وَالْبُرَاهِينَ عَلَيْهِ فَصَارَ الْمُقْتَدَى بِهِ فِي ذَلِكَ السَّالِكِ سَبِيلَهُ فِي الدَّلَائِلِ يُسَمَّى أَشْعَرِيًّا..


“Ketahuilah olehmu sesungguhnya [Imam] Abu al-Hasan [al-Ash'ari] tidak mencipta pendapat baru, dan tidak membina satu mazhab baru. Hanyasanya beliau menetapkan pandangan-pandangan Salaf [Soleh], memperjuangkan apa yang dipegang oleh para Sahabat Rasulullah ﷺ.

Maka penisbahan [aqidah Ahli Sunnah dan Jama'ah] kepada beliau adalah kerana beliau yang mengikat jalan [aqidah] Salaf [Soleh] dengan perkataan, dan beliau berpegang kemas dengannya, dan mendirikan hujah-hujah dan bukti-bukti untuknya.

Maka jadilah seseorang yang mengikutinya di dalam perkara itu, yang menjalani jalannya dalam mendirikan dalil-dalil tersebut dinamakan sebagai Ash'ari.”

(Taj al-Din al-Subki, 2003). Vol. 3, ms.365.

Gambarajah 1: Ahli Sunnah dan Jama'ah: Masa, Manhaj, Mazhab dan Peranan



Sumber: Abdullaah Jalil. (2018, 27 Oktober). *Sumbangan Ilmuan Fiqah dalam Pemikiran Al-Ash'ariyyah*.

Aqidah ASWJ adalah aqidah yang menepati aqidah Rasulullah ﷺ dan para Sahabat r.a. serta ulama' dari kalangan generasi salafus soleh (<300H) dan khalaf tayyib (>300H). Bahkan, aqidah ini adalah aqidah majoriti para fuqaha', usuliyin, mufassirin, muhaddithin, ulama' sufi, ulama' bahasa arab dan lain-lain. Aqidah ini juga adalah aqidah majoriti para pemerintah umat Islam dan rakyatnya sejak dulu hingga sekarang. Namun begitu, sejak akhir-akhir ini, sebahagian masyarakat Islam khususnya di Malaysia mula kabur tentang kedudukan ASWJ, manhajnya, mazhabnya dan peranannya.

Oleh kerana itu, kertas kerja ini bertujuan untuk membentangkan sejarah dan latar belakang kemunculan Ahli Sunnah dan Jama'ah serta perkembangannya agar para pembaca dapat memahami bahawa kemunculan istilah atau gelaran ASWJ ini adalah merupakan respon para ulama' Islam muktabar terhadap kemunculan golongan-golongan yang sesat. Walaupun

sebahagian ulama' berpandangan bahawa istilah ini datangnya dari hadith Rasulullah ﷺ, namun dari sudut sejarah istilah ini muncul selari dengan dua tokoh besarnya iaitu Imam Abu al-Hasan al-Ash'ari dan Imam Abu al-Hasan al-Maturidi.

Perpecahan Umat dan Panduan Rasulullah ﷺ

Rasulullah ﷺ telah memberitahu tentang perpecahan umat Baginda yang bakal berlaku sepertimana berlakunya perpecahan golongan Yahudi dan Nasrani. Namun begitu, Rasulullah ﷺ juga telah memberikan panduan yang jelas bagi jalan keselamatan ketika berlakunya perpecahan dan kekeliruan ini. Berdasarkan hadith-hadith dalam bab ini, jalan keselamatannya adalah seperti berikut.

1. *Al-Sawad Al-A'zam* (Majoriti ulama' dan umat Islam)
2. *Al-Jama'ah* (Majoriti ulama' dan umat Islam)
3. Pegangan Rasulullah ﷺ dan para Sahabat r.a.
4. Kitab Allah dan Sunnah Rasulullah ﷺ
5. Kitab Allah dan keluarga/keturunan Rasulullah ﷺ

Kelima-lima jalan keselamatan adalah merujuk kepada satu hakikat yang sama dan tidak saling bertentangan.

Umat Rasulullah ﷺ Umat Terpelihara Pada Kesepakatan Mereka

Umat Rasulullah ﷺ diberi keistimewaan oleh Allah ﷻ untuk tidak berhimpun dan bersepakat di atas kesesatan selama-lamanya. Keistimewaan ini tidak diberikan kepada umat-umat Nabi terdahulu. Sebagai contoh, umat Nabi Musa عليه السلام pernah sesat beramai-ramai – melainkan Nabi Harun عليه السلام - menyembah patung anak lembu kerana fitnah dan penipuan Samiri. Begitu juga, ijma' (persepakatan para ulama' Islam pada satu masa/zaman) menjadi hujah dan dalil yang disepakati bagi umat ini.

“Kebenaran Kesepakatan Ulama' Umat Islam” menjadi neraca yang penting dalam menentukan kedudukan sesuatu kefahaman atau mazhab pemikiran di sisi ASWJ. Jika sesuatu kefahaman dan pemikiran itu ditolak dan ditentang dengan kesepakatan ulama' umat Islam, maka dengan mudah kita dapat mengetahui bahawa ia adalah sesuatu yang batil.

Perkhabaran Rasulullah ﷺ Tentang Kemunculan Fitnah

Rasulullah ﷺ juga memberi perkhabaran tentang kemunculan ahli bid'ah dari individu tertentu atau dengan ciri-ciri tertentu yang menjadi punca perpecahan umat Islam. Terdapat banyak hadith berkenaan perkhabaran seumpama ini. Namun, penulis menyatakan sebahagian kecil sahaja sebagai contoh.

Lelaki Khawarij Yang Menjadi Punca Pertelingkahan Umat

Rasulullah ﷺ pernah bersabda berkenaan seorang lelaki yang zahirnya kuat beribadat dan berjihad, namun bersikap sombong dan merasakan dirinya sebagai terbaik. Baginda ﷺ kemudiannya memerintahkan Saidina Abu Bakar r.a., kemudian Saidina 'Umar r.a. dan akhirnya Saidina 'Ali r.a. untuk membunuhnya, tetapi tidak berjaya dilakukan. Maka Rasulullah ﷺ pun bersabda :

أَمَّا وَاللَّهِ لَوْ قَتَلَهُ، لَكَانَ أَوَّلَهُمْ وَآخِرَهُمْ، وَمَا اخْتَلَفَ فِي أُمَّتِي اثْنَانِ

“Demi Allah, jika beliau (Saidina 'Ali r.a.) berjaya membunuhnya, maka ia adalah lelaki pertama dan terakhir [dari kalangan mereka], dan tidak akan berlaku pertelingkahan di kalangan umatku walaupun dua orang.”

Dalam riwayat yang lain, lafaznya berbunyi:

لَوْ قُتِلَ الْيَوْمَ مَا اخْتَلَفَ رَجُلَانِ مِنْ أُمَّتِي حَتَّى يُخْرَجَ الدَّجَالُ

“Jika dia dibunuh pada hari ini, maka tidak akan ada dua lelaki dari kalangan umatku yang akan bertelingkah sehingga keluarnya Dajjal.”

Sebahagian riwayat menyatakan lelaki ini adalah Dhu al-Khuwaysirah atau Dhu al-Thudayyah yang bernama Hurqus bin Zuhayr al-Bajali. Saidina 'Ali r.a. dan tentera beliau akhirnya berjaya membunuhnya di dalam peperangan terhadap Khawarij Haruriyyah.

Agamawan Yang Membawa Fahaman Takfir

Saidina Huzayfah r.a. meriwayatkan bahawa Rasulullah ﷺ bersabda:

((إِنِّ مَا أَخَوَفُ عَلَيْكُمْ رَجُلٌ قَرَأَ الْقُرْآنَ حَتَّى رُئِيتَ بِهِجْتُهُ عَلَيْهِ، وَكَانَ رِدْنًا لِلْإِسْلَامِ، غَيْرَهُ إِلَى مَا شَاءَ اللَّهُ، فَانْسَلَخَ مِنْهُ وَنَبَذَهُ وَرَاءَ ظَهْرِهِ، وَسَعَى عَلَى جَارِهِ بِالسَّيْفِ، وَرَمَاهُ بِالشَّرِكِ))، قَالَ: قُلْتُ: يَا نَبِيَّ اللَّهُ، أَيُّهُمَا أَوْلَى بِالشَّرِكِ، الْمَرْمِيُّ أَمْ الرَّامِيُّ؟ قَالَ: ((بَلِ الرَّامِيُّ))

Daripada Huzayfah ؓ, beliau berkata: Rasulullah ﷺ bersabda:

“Sesungguhnya apa yang aku sering takutkan ke atas kamu semua ialah (kemunculan) seorang lelaki yang membaca al-Quran sehingga tampak jelas padanya keindahannya; bahkan dia pernah menjadi penolong/pembantu bagi agama Islam. Kemudian (Allah) mengubahnya kepada sesuatu yang dikehendaki olehNya, maka tergelincirlah lelaki itu daripadanya (petunjuk al-Qur’an) dan dia mencampakkannya (al-Quran) ke belakangnya, bahkan dia juga mengangkat pedang ke atas jirannya (saudara satu agamanya) dan menuduhnya (jirannya) dengan kesyirikan.

Huzayfah ؓ berkata: Aku berkata: Wahai Nabi Allah! Siapakah di antara kedua-dua mereka yang lebih layak dengan kesyirikan: pihak yang dituduh atau pihak yang menuduh?.

Baginda ﷺ menjawab: Bahkan, pihak yang menuduh (lebih hampir dengan kesyirikan).”

T: (Ibn Hibbān, 1993), No. 81 [Lafaz di atas] : Sanadnya sahih; (al-Bazzār, 1997), No. 2793; (al-Bukhārī, 2001), No. 2907; (Ibn Hajar al-‘Asqalānī, 1998), No. 4356; (al-Būshīrī, 1998), No. 5973 dan lain-lain. [Status: Sahih]

Khawarij Akhir Zaman

Saidina ‘Ali ؓ meriwayatkan bahawa Rasulullah ﷺ telah bersabda:

سَيَخْرُجُ فِي آخِرِ الزَّمَانِ قَوْمٌ أَحْدَاثُ الْأَسْنَانِ، سُفَهَاءُ الْأَحْلَامِ، يَقُولُونَ مِنْ خَيْرِ قَوْلِ الْبَرِيَّةِ، يَقْرَأُونَ الْقُرْآنَ لَا يُجَاوِزُ حَنَاجِرَهُمْ، يَمْرُقُونَ مِنَ الدِّينِ كَمَا يَمْرُقُ السَّهْمُ مِنَ الرَّمِيَّةِ، فَإِذَا لَقِيتُمُوهُمْ فَاقْتُلُوهُمْ، فَإِنَّ فِي قَتْلِهِمْ أَجْرًا لِمَنْ قَتَلَهُمْ عِنْدَ اللَّهِ يَوْمَ الْقِيَامَةِ

“Akan keluar di akhir zaman nanti satu kumpulan manusia dari kalangan orang-orang muda (*hudatha’/ahdath al-asnan*) yang mempunyai akal-akal yang bodoh/lemah (*sufaha’ al-ahlam*); mereka berkata daripada sebaik-baik perkataan yang diucapkan para makhluk (daripada al-Qur’an dan Hadith); mereka membaca al-Qur’an tetapi ia tidak melepasi pangkal leher mereka (mereka tidak memahaminya); mereka terpancar keluar daripada agama ini

seperti terpancarnya anak panah dari busurnya (cepat dan sukar untuk kembali pulih).

Dan apabila kamu bertemu dengan mereka, maka perangilah mereka; sesungguhnya pada peperangan terhadap mereka itu pahala yang disediakan di sisi Allah pada Hari Kiamat nanti buat umat Islam yang memerangi mereka (Khawarij yang muncul di akhir zaman).”

T: (Muslim, 2006), No. 1066 [Lafaz di atas], 1067 & 1068; (al-Bukhārī, 1999); (Abū Dāwud, 2010); (al-Nasā'ī, 1986b) dan lain-lain.

Al-Sayyid al-Sharif ‘Abdullah bin al-Sayyid al-Sharif Hasan Basha al-Hijazi telah membuat perbahasan tentang perbezaan Khawarij di zaman awal dan akhir zaman di dalam bukunya bertajuk: *Sidq al-Khabar fi Khawarij al-Qarn al-Thani 'Ashar* ('Abdullah Hasan Basha).

PERGOLAKAN AWAL UMAT DI ERA KHULAFAH RASHIDIN

Era Khilafah Saidina Abu Bakar r.a.

Setelah kewafatan Rasulullah ﷺ, Saidina Abu Bakar r.a. telah dilantik menjadi Khalifah Baginda ﷺ yang pertama. Beliau menghadapi dua fitnah yang besar iaitu: (i) Fitnah Nabi Palsu Musaylamah al-Kazzab dan (ii) Fitnah golongan yang enggan membayar zakat. Namun begitu, beliau berjaya menghapuskan kedua-dua fitnah ini dengan kerjasama daripada para Sahabat r.a. yang lain. Era Khilafah beliau hanyalah dalam tempoh dua (2) tahun tiga bulan. Beliau telah wafat pada malam Isnin, 22 Jamadil Akhirah 13H.

Era Khilafah Saidina ‘Umar r.a.

Sebelum Saidina Abu Bakar r.a. meninggal dunia, beliau telah berwasiat agar Saidina ‘Umar al-Khattab r.a. diangkat sebagai Khalifah. Saidina ‘Umar r.a. adalah khalifah pertama yang menggunakan gelaran Amir al-Mu'minin. Di antara pencapaian besar di zaman beliau ialah kemenangan ke atas empayar Parsi melalui Saidina Sa'd bin Abu Waqqas r.a. di dalam peperangan al-Qadisyyah dan pembukaan Palestin dan Mesir di tangan Saidina ‘Amr bin al-‘As r.a. Beliau juga memperkenalkan sistem kharaj, senarai *dawāwīn*, kalendar Hijrah, sistem hisbah, pos, pembukaan bandar, penyusunan wilayah dan lain-lain. Beliau juga berjaya memadamkan fitnah-

fitnah sebelum ia merebak seperti fitnah Ṣabīgh bin ‘Isl dari Kufah. Khilafah beliau berterusan selama sepuluh tahun enam bulan.

Kesyahidan Saidina ‘Umar Al-Khattab ؓ: Terbukanya Pintu Fitnah

Saidina ‘Umar ؓ akhirnya dibunuh oleh seorang majusi bernama Abu Lu’lu’ah Fayruz al-Farisi dari hari Rabu, 26 Zul Hijjah 23H (644M). Beliau telah ditikam sebanyak 6 kali oleh Abu Lu’lu’ah dengan sebilah pisau besar (pedang) yang mempunyai dua mata. Setelah insiden tersebut, beberapa orang Muslimin yang hadir cuba menangkap Abu Lu’lu’ah, namun dia telah menikam 13 orang daripada mereka dan seramai 6 orang telah maut. Melihatkan keadaan itu, Saidina Abdurrahman Bin ‘Awf ؓ telah melemparkan sebidang kain ke atas Abu Lu’lu’ah dan apabila dia merasakan bahawa dia akan ditangkap, dia pun membunuh dirinya sendiri. Fitnah mula terbuka melanda umat Islam setelah kewafatan Saidina ‘Umar ؓ. Ini juga telah diberitahu oleh Rasulullah ﷺ bahawa Saidina ‘Umar ؓ adalah pintu yang menghalang kedatangan fitnah ke atas umat Islam.

Khilafah Saidina Uthman ؓ

Saidina ‘Uthman ؓ kemudiaanya diangkat menjadi Khalifah selepas Saidina ‘Umar bin Al-Khattab ؓ melalui pemilihan majlis Shura. Khilafah Saidina ‘Uthman ؓ berterusan selama 12 tahun. Di antara perkara penting yang dilakukan beliau ialah menghimpunkan Al-Qur’an di atas satu rasm dan memperluaskan Masjidil Haram dan Masjid Nabawi. Pada separuh kedua Khilafah beliau, peristiwa fitnah mula timbul sehingga membawa kepada kesyahidan beliau.

Kemunculan Abdullah Bin Saba’

Terdapat banyak faktor yang menyebabkan timbulnya fitnah di zaman beliau. Di antara faktor utamanya ialah kemunculan Abdullah bin Saba’, seorang Yahudi yang memeluk agama Islam dengan tujuan membawa fitnah. Dia adalah orang yang bertanggungjawab menyalakan api fitnah terhadap Saidina ‘Uthman r.a., mendakwa Saidina ‘Ali r.a. sebagai pemegang wasiat Rasulullah ﷺ dan bersifat ketuhanan serta memulakan cacian terhadap Saidina Abu Bakar r.a., Saidina ‘Umar r.a., Saidatina ‘A’ishah r.a. dan para

Sahabat r.a. yang lain. Dia disebut sebagai punca kepada Syiah dan perang Jamal.

Pada awalnya terdapat beberapa aduan yang dibuat terhadap beberapa wakil di dalam pemerintahannya. Kemudian, fitnah mula merebak ke atas dirinya. Golongan yang mengepung Saidina ‘Uthman ؓ dan membuat fitnah bahawa Saidina ‘Uthman ؓ mahu membunuh mereka sedangkan beliau telah pun berjanji untuk memberi keamanan kepada mereka. Mereka juga mendesak Saidina ‘Uthman ؓ supaya melepaskan jawatan Khalifah. Mereka juga menuduh Saidina ‘Uthman ؓ telah memalsukan Al-Qur’an dan mengamalkan nepotisma di dalam Khilafah beliau. Namun Saidina ‘Uthman ؓ sendiri melarang para Sahabat yang lain untuk mengangkat pedang mereka terhadap golongan ini. Bahkan, hakikat ini telah diberitahu oleh Rasulullah ﷺ kepada beliau bahawa ketika beliau menjawat jawatan Khalifah, akan ada golongan yang mendesak beliau untuk melepaskan jawatan Khalifah, namun beliau diperintahkan untuk tidak melepaskannya.

Pembunuhan Saidina ‘Uthman ؓ: Al-Fitnah Al-‘Ula

Beliau telah dibunuh oleh golongan pemberontak ini - disebabkan fitnah yang dilemparkan terhadap beliau - pada hari Jumat, 12 Zul Hijjah 35H ketika beliau berumur 82 tahun (al-Buti, 1991). Peristiwa ini dikenali sebagai “Al-Fitnah Al-‘Ula” atau Fitnah Pertama kerana beliau dibunuh oleh golongan umat Islam sendiri yang terhasut oleh fitnah.

Khilafah Saidina ‘Ali r.a.

Dengan kewafatan Saidina ‘Uthman r.a., api fitnah di dalam umat Islam semakin merebak. Para Sahabat r.a. dari kalangan ahli Badar telah memberi bay’ah kepada Saidina ‘Ali r.a. sebagai Khalifah setelah kewafatan Saidina Uthman r.a. pada pertengahan bulan Zul Hijjah tahun 35H setelah pembunuhan Saidina ‘Uthman r.a. Namun begitu, ada sebahagian sahabat yang belum memberi bay’ah kepada beliau seperti Saidina Sa’d bin Abu Waqqas r.a., Saidina Usamah bin Zayd r.a., Saidina al-Mughirah bin Shu’bah r.a., Saidina al-Nu’man bin Bashir dan Saidina Hassan bin Thabit r.a. (al-Buti, 1991) Apabila Saidina ‘Ali r.a. dibay’ah menjadi khalifah, beliau mula memecat beberapa pemimpin yang menjadi punca fitnah pada zaman Saidina ‘Uthman r.a..

Peperangan Jamal

Saidina ‘Ali r.a. tidak mengabaikan tanggungjawab untuk menangkap dan melakukan hukuman Qisas ke atas pembunuh Saidina ‘Uthman r.a.. Namun, beliau tidak mengambil sikap tergesa-gesa dalam perkara itu kerana terdapat beberapa perkara perlu dilakukan bagi memastikan perlaksanaannya kelak jauh dari fitnah. Namun sebahagian sahabat seperti Saidina Talhah r.a. dan Saidina al-Zubayr r.a. berpandangan bahawa hukuman atas pembunuh Saidina ‘Uthman رضي الله عنه perlu dilakukan dengan segera bagi memastikan keamanan dan mengelakkan fitnah. Mereka juga menawarkan khidmat mereka kepada Saidina ‘Ali r.a. untuk menangkap pembunuh tersebut bersama tentera dari Kufah dan Basrah. Secara kesimpulannya, semua para Sahabat berjihad dalam menyelesaikan jenayah pembunuhan ini.

Para Sahabat yang berpandangan bahawa hukuman atas pembunuh Saidina ‘Uthman r.a. perlu disegerakan telah berkumpul di Basrah dan di kalangan mereka adalah Saidatina ‘A’ishah r.a., Saidina Talhah r.a., Saidina al-Zubayr r.a. dan ramai dari kalangan Sahabat r.a.. Tentera Saidina ‘Ali r.a. juga bergerak ke sana untuk memperbaiki keadaan dan menyatukan umat serta tidak ada sebarang azam di kalangan mereka untuk berperang atau melakukan fitnah. Melalui wakil Saidina ‘Ali r.a. iaitu al-Qa’qa’ bin ‘Amr yang bertemu dengan ketiga-tiga para Sahabat tersebut, akhirnya mereka semua bersetuju untuk menyerahkan urusan tersebut kepada Saidina ‘Ali r.a. dan memberi masa yang cukup kepada beliau. Sulh telah tercapai dan diberitahu kepada orang ramai.

Persetujuan dan perdamaian ini mahu disabotaj oleh kepala-kepala fitnah seperti Al-Ashtar al-Nakha’i, Shurayh bin Awfa, Abdullah bin Saba’(Ibn al-Sawda’), Salim bin Tha’labah dan Ghulam bin al-Haytham. Pada awalnya, mereka bercadang untuk membunuh Saidina ‘Ali r.a.. Namun Abdullah bin Saba’ kemudian mencadangkan agar pertelingkahan sesama para Sahabat dinyalakan. Maka mereka – sekitar 2000 orang – pergi ke rombongan Saidina ‘Ali dan juga Saidina Talhah r.a. sebelum Subuh dan menyerang mereka. Setiap pihak merasa terkejut dan menyangka mereka dikhianati oleh pihak yang lain. Mereka mula mengangkat pedang dan berhimpun. Tentera Saidina ‘Ali r.a. sebanyak 20,000 orang dan tentera Saidatina ‘A’ishah r.a. sebanyak 30,000. Pihak penyeru dari Saidina ‘Ali r.a. melaungkan: “Cukup, cukup, jangan kalian berperang,” tetapi tidak diendahkan. Perang mula tercetus, tetapi para Sahabat r.a. dari kedua-dua

pihak tidak mampu mengangkat pedang sesama mereka. Saidina ‘Ali r.a. sempat bertemu dengan Saidina al-Zubayr r.a. dan mengingatkan pesanan Rasulullah ﷺ kepadanya. Akhirnya Saidina al-Zubayr r.a. keluar meninggalkan medan perang. Dan apabila khemah kecil (*hawdaj*) Saidina ‘A’ishah r.a. jatuh dari untanya, Saidina ‘Ali r.a. dan para Sahabat yang lain pergi menziarahinya, memberi salam kepadanya serta memastikan keselamatannya. Peperangan ini dinamakan perang Jamal kerana nisbah kepada unta yang dinaiki oleh Saidatina ‘A’ishah r.a. Ia berlaku pada tahun 36H.

Peperangan Sifin

Setelah itu Saidina ‘Ali r.a. pulang ke Kufah yang dijadikan sebagai pusat Khilafahnya. Beliau kemudiannya, mengutuskan Jarir bin Abdullah al-Bajali kepada Saidina Mu’awiyah r.a. di Syam untuk berbai’ah kepada beliau. Namun begitu Saidina Mu’awiyah r.a. berpandangan bahawa bai’ah Saidina ‘Ali r.a. masih belum sah kerana belum semua para Sahabat memberi bai’ah kepada beliau dan bai’ah tidak sah melainkan dengan bai’ah kesemua para Sahabat r.a.. Beliau menolak jemputan bai’ah tersebut sehinggalah pembunuh-pembunuh Saidina ‘Uthman r.a. dihukum dan setelah itu para Muslimin memilih pemimpin mereka. Saidina ‘Ali r.a. berpandangan bahawa bai’ah kepada beliau telah disepakati oleh penduduk Madinah dan ia perlu diikuti oleh kawasan-kawasan yang lain. Majoriti ulama’ Ahli Sunnah dan Jama’ah menyatakan bahawa Saidina ‘Ali ﷺ adalah benar di dalam ijtihad beliau berbanding dengan ijtihad Saidina Mu’awiyah ﷺ. Mereka berdua adalah sahabat Rasulullah ﷺ yang layak berijtihad dan kita menyebut kedua-dua mereka dengan kebaikan dan kita menyintai mereka berdua.


Perang Sifin pula berlaku di antara ijtihad Saidina ‘Ali ﷺ dan ijtihad Saidina Mu’awiyah ﷺ. Saidina ‘Ali ﷺ berpandangan bahawa Khilafah beliau adalah sebuah khilafah yang sah dan golongan yang ingkar adalah bughah. Maka Saidina ‘Ali r.a. membawa tenteranya ke Nakhilah. Dan apabila mendengar hal itu, Saidina Mu’awiyah r.a. membawa tenteranya ke sana. Mereka berdua mula bertemu di Sifin tebing sungai Furat dan saling menghantar utusan berkenaan perbincangan isu bai’ah dan mencari pembunuh Saidina ‘Uthman r.a.. Kemudian berlaku perjanjian keamanan di antara mereka sehinggalah tamat tempohnya, maka peperangan berlaku sehingga tentera Saidina Mu’awiyah r.a. hampir kalah. Kemudian Saidina Mu’awiyah menawarkan untuk berhukum dengan Al-Qur’an, namun Saidina

‘Ali r.a. lebih cenderung untuk terus mengalahkannya. Namun begitu, Saidina ‘Ali r.a. akur dengan cadangan tersebut kerana tekanan yang kuat daripada para pengikutnya.

Penubuhan Majlis Tahkim

Akhirnya satu Majlis Tahkim ditubuhkan dengan wakil daripada kedua-dua pihak iaitu Saidina Abu Musa al-Ash’ari r.a. dan Saidina ‘Amr bin al-‘As r.a.. Mereka membuat keputusan agar ditangguh keputusan tersebut ke bulan Ramadan di Dawmat/Dumat al-Jandal.

Gambarajah 2: Majlis Tahkim



Dengan berlakunya penentangan terhadap keputusan penubuhan Majlis Tahkim, maka lahirkan dua golongan terawal dari kumpulan ahli bid’ah iaitu Khawarij dan Syiah.

Fitnah Abdullah Bin Saba’

Fitnah ‘Abdullah bin Saba’ juga berterusan sehingga ke zaman Saidina ‘Ali ؑ. Sebahagian mula mendakwa bahawa Saidina ‘Ali r.a. adalah merupakan nabi yang asal dan Saidina Jibril ؑ tersilap memberi wahyu kepada Saidina Nabi Muhammad ؐ (Ghurabiyyah). Bahkan sebahagian mereka mula mendakwa ketuhanan kepada Saidina ‘Ali r.a.. Saidina ‘Ali ؑ telah berjaya menangkap sebahagian daripada mereka dan membakar mereka sebagai hukuman. Namun, ‘Abdullah bin Saba’ terlepas.

Kemunculan Khawarij Haruriyyah

Apabila Saidina ‘Ali r.a. pulang dari Sifin, sebahagian pengikutnya mula mendakwa Majlis Tahkim adalah satu kesesatan, maka mereka mula keluar meninggalkan Saidina ‘Ali r.a. dan menetap di Harura’ (Haruriyyah). Jumlah mereka hampir 12,000 orang. Saidina ‘Ali r.a. telah mengutuskan Saidina ‘Abdullah bin ‘Abbas r.a. untuk memujuk dan berdebat dengan mereka.

Keputusan Majlis Tahkim

Dalam masa yang sama, Saidina ‘Ali r.a. juga telah mengutuskan Saidina Abu Musa al-Ash’ari r.a. bersama sebahagian tenteranya ke Dawmat/Dumat al-Jandal. Akhirnya setelah Majlis Tahkim bersetuju memecat kedua-dua Saidina ‘Ali r.a. dan Saidina Mu’awiyah r.a., Saidina ‘Amr ibn al-‘As mula melantik Saidina Mu’awiyah r.a. sebagai Khalifah. Keputusan ini ditolak oleh Saidina ‘Ali r.a.

Peperangan Saidina ‘Ali r.a. dengan Khawarij

Pada awalnya Saidina ‘Ali r.a. menyiapkan tenteranya untuk menuju ke Syam bertemu Saidina Mu’awiyah, namun begitu telah sampai berita kekejaman golongan Khawarij kepada beliau. Beliau bimbang kekejaman golongan Khawarij akan merebak ke kawasan beliau sekiranya beliau pergi ke Syam. Maka, beliau pun mengarahkan tenteranya berperang dengan Khawarij dan mereka memenangi peperangan tersebut. Setelah itu, sebahagian penduduk Iraq mula berbeza pandangan dengan Saidina ‘Ali r.a. dan mula memberi ketaatan kepada Saidina Mu’awiyah r.a. dengan berpegang kepada keputusan Majlis Tahkim.

Pembunuhan Saidina ‘Ali r.a.

Saidina ‘Ali r.a. dibunuh oleh salah seorang golongan Khawarij, yang dikenali sebagai ‘Abd al-Rahman bin Muljam.

Khilafah Saidina Al-Hasan r.a.

Setelah kesyahidan Saidina ‘Ali r.a., Saidina al-Hasan menarik dirinya dari kedudukan sebagai Khalifah menandakan berakhirnya era Khulafa’ al-Rashidin. Rasulullah ﷺ bersabda (Ahmad, 1995; al-Nasā’ī, 1986a; al-Tirmidhī):

الْخِلَافَةُ فِي أُمَّتِي ثَلَاثُونَ سَنَةً ثُمَّ مُلْكٌ بَعْدَ ذَلِكَ

“Khilafah [Nabawiyyah] pada umatku hanyalah dalam tempoh tiga puluh (30) tahun [selepas kewafatanku]. Kemudian, pemerintahan [Muslimin] selepas itu.”

Jadual 1: Khilafah Nabawiyyah Menurut Hadith Rasulullah ﷺ

Bil.	Khilafah Nabawiyyah	Tempoh	
		1	Saidina Abu Bakar ﷺ
2	Saidina ‘Umar ﷺ	10 tahun	6 bulan
3	Saidina ‘Uthman ﷺ	12 tahun	-
4	Saidina ‘Ali ﷺ	4 tahun	9 bulan
5	Saidina Al-Hasan ﷺ (3H-49H)	-	6 bulan
	Jumlah	28 tahun	24 bulan (2 tahun)
		30 tahun	

Dalam mendepani perbezaan pendapat di kalangan para Sahabat khususnya di antara Saidina ‘Ali r.a. dan Saidina Mu’awiyah r.a., ASWJ menyatakan bahawa kedua-dua mereka adalah sahabat Rasulullah ﷺ yang *‘udul* (amanah lagi dipercayai). Mereka berdua adalah ahli *ijtihad* dan *ijtihad* mereka adalah untuk mencari kebenaran dan bukannya keduniaan. *Ijtihad* yang tepat dari kalangan mereka diganjar dengan dua pahala dan *ijtihad* yang kurang tepat diganjar dengan satu pahala; kedua-duanya mendapat pahala di sisi Allah. Dan majoriti ulama’ ASWJ berpandangan bahawa *ijtihad* Saidina ‘Ali r.a. lebih tepat berbanding *ijtihad* Saidina Mu’awiyah r.a. Semoga Allah meredai mereka berdua dan para Sahabat yang lain serta umat Islam yang mengikut *ijtihad* mereka berdua.

PERPECAHAN UMAT DENGAN KEMUNCULAN KELOMPOK BID’AH YANG TERAWAL DI AKHIR ZAMAN PARA SAHABAT

Kemunculan Golongan Khawarij (Haruriyyah) – Kelompok Bid’ah Pertama dan Peperangan Nahrawan

Khawarij adalah merupakan golongan ahli bid’ah yang pertama muncul di dalam sejarah umat Islam. Al-Imam al-Hafiz Ibn Kathir menyebut di dalam Tafsirnya (Juzuk 1, Surah Ali ‘Imran, ayat 7-9) :

فَإِنَّ أَوَّلَ بَدْعَةٍ وَقَعَتْ فِي الْإِسْلَامِ فِتْنَةُ الْخَوَارِجِ

“Maka sesungguhnya bid’ah yang pertama berlaku di dalam Islam adalah fitnah Khawarij.”

Khawarij mula muncul kerana sebahagian pengikut Saidina ‘Ali r.a. tidak bersetuju dengan penubuhan Majlis Tahkim. Pada awalnya, mereka cuba memujuk Saidina ‘Ali r.a. untuk menarik diri daripada Majlis Tahkim dan meneruskan peperangan dengan Saidina Mu’awiyah r.a. tetapi tidak berjaya. Saidina ‘Ali r.a. juga cuba memujuk mereka tetapi tidak berjaya. Akhirnya mereka menarik diri dari memberi ketaatan kepada Saidina ‘Ali r.a. dan melantik Ma’dan al-Iyadi sebagai pemimpin mereka. Setelah itu mereka memecatnya dan menggantikannya dengan Abdullah bin Wahb al-Rasibi. Al-Rasibi mengetuai tentera Khawarij Haruriyyah ke peperangan Nahrawan dan berperang dengan tentera Saidina ‘Ali r.a.. Akhirnya, mereka dikalahkan oleh tentera Saidina ‘Ali r.a. Syiar mereka ketika itu ialah:

لا حكم إلا حكم الله / الله

“Tiada hukum melainkan hukum Allah/ bagi Allah”.

Antara kelompok Khawarij lain yang terawal adalah Azariqah dan Ibadiyyah.

Kemunculan Golongan Syiah

Golongan ekstrim Syiah (*ghulat*) pula muncul dengan fitnah yang dibawa oleh seorang Yahudi Yaman yang berpura-pura masuk Islam bernama ‘Abdullah Bin Saba’ al-Himyari sepertimana yang telah dinyatakan sebelum ini. Dia mendakwa Saidina ‘Ali r.a. belum meninggal dunia dan akan kembali semula (*raj’ah*). Golongan Syiah pula muncul sebagai pendukung yang ekstrim bagi Saidina ‘Ali r.a. dan anak-anak serta keturunan beliau dan memusuhi para Sahabat yang lain melainkan sebahagian kecil sahaja. Golongan yang ekstrim dari kalangan mereka juga dikenali sebagai Rafidah. Golongan Syiah menganggap Khilafah Umawiyah sebagai satu rampasan kuasa daripada Saidina al-Hasan r.a. dan Saidina al-Husayn r.a.

Fitnah Karbala' dan Pembunuhan Saidina al-Husayn r.a. (w.61H)

Setelah penurunan Saidina al-Hasan r.a. dari kedudukan Khilafah agar perdamaian sesama umat Islam berlaku dengan baik, golongan Syiah menjangkakan Saidina Mu'awiyah r.a. akan menyerahkan Khilafah kepada Saidina al-Husayn r.a.. Mereka cuba membuat helah dan memujuk Saidina al-Husayn r.a. naik menjadi Khalifah. Perkara ini akhirnya membawa kepada kesyahidan Saidina al-Husayn r.a. di Karbala', Iraq pada zaman Khalifah Yazid bin Saidina Mu'awiyah r.a., tahun 61H, 10 Muharram. Pembunuhan Saidina al-Husayn r.a. telah menyebabkan berlakunya beberapa pemberontakan dan peperangan selepas itu.

Kemunculan Qadariyyah (Sekitar 99H)

Kelompok Qadariyyah mula muncul melalui Ma'bad al-Juhani al-Basri di Basrah pada akhir zaman para Sahabat r.a. Para sahabat yang menolak aqidah mereka adalah seperti Saidina 'Abdullah bin 'Umar r.a., Saidina Abu Hurayrah r.a., Saidina Abdullah bin 'Abbas r.a., Saidina Anas bin Malik r.a. dan lain-lain. Kemudian, Ghaylan al-Dimashqi al-Qadari menzahirkannya dan menyebarkan pada awal era 'Umar bin Abd al-'Aziz. Ma'bad al-Juhani dikatakan mengambil pemikiran Qadariyyah daripada seorang Nasrani (Abu Yunus al-Aswari) yang memeluk Islam dan kemudiannya murtad semula. Khalifah 'Abd al-Malik bin Marwan mengarahkan Ma'bad dihukum dengan dipalang di Damsyiq. Khalifah 'Umar bin 'Abd al-'Aziz pula mengarahkan Ghaylan untuk bertaubat sehingga dia bertaubat pada zaman khilafahnya. Setelah kewafatan Umar bin Abd al-Aziz, Ghaylan kepada kepada bid'ah Qadariyyahnya, lalu Khalifah Hisham bin Abd al-Malik menangkapnya dan meletakkannya di palang.

Kemunculan Murji'ah

Bid'ah Murji'ah juga muncul pada akhir zaman para Sahabat r.a. Dari sudut istilahnya yang lebih tepat, ia merujuk kepada pandangan yang menyatakan bahawa Iman adalah perkataan tanpa amalan atau pengetahuan semata-mata dan ia tidak bertambah dan tidak berkurang. Ia mula ditimbulkan oleh al-Jahm bin Safwan.

Kemunculan al-Mu'attilah dan al-Jahmiyyah (w.128H)

Selain daripada pemikiran Irja' atau Murji'ah, Jahm bin Safwan juga membawa fahaman Ta'til yang menafikan sifat bagi Allah. Beliau mengambil fahamannya ini dari al-Ja'd bin Dirham. Mereka mula muncul selepas kewafatan Saidina 'Umar Bin 'Abd al-Aziz.

Al-Ja'd bin Dirham inilah yang membawa fahaman melampau sehingga menafikan sifat bagi Allah, ajaran Ta'til. Dengan kefahaman ini, dia mula mendakwa al-Qur'an sebagai makhluk. Dia juga mendakwa Allah tidak memuliakan Nabi Ibrahim a.s. sebagai *khalilullah* dan Allah tidak berkata-kata dengan Nabi Musa a.s. dan perkara itu tidak harus bagi Allah (al-Dhahabi, 1992). Sebahagian ulama' menyatakan dia sebagai seorang zindiq.

Sebahagian riwayat menyatakan Al-Ja'd bin Dirham mengambil pandangan Al-Qur'an adalah makhluk daripada Aban bin Sam'an. Dan Abban ibn Sam'an pula mengambilnya daripada Talut bin Ukht (saudara perempuan) Labid bin Al-A'sam, dan Talut mengambilnya dari bapa saudara sebelah ibunya iaitu Labid bin al-A'sam al-Yahudi (Ibn Kathir, 1988). Al-Ja'd bin Dirham akhirnya ditangkap oleh Khalid bin Abdullah al-Qasri (Dawlah Umawiyah) dan dihukum bunuh pada hari raya Aidil Adha tahun 105H.

Jahmiyyah adalah kelompok yang dinisbahkan kepada al-Jahm Bin Safwan. Kelompok Jahmiyyah bukan sahaja menafikan sifat bagi Allah serta mengatakan Al-Qur'an sebagai makhluk, mereka juga menyatakan bahawa Allah itu berada di semua tempat dengan zat-Nya (Ibn Kathir, 1988). Al-Jahm menyebarkan fahamannya di Tirmidh dan bandar-bandar Khurasan setelah dihalau ke sana. Beliau akhirnya dibunuh kerana menyertai pemberontakan terhadap Dawlah Umawiyah pada tahun 128H.

Kemunculan Jabariyyah

Kesesatan Jabariyyah juga dimulakan oleh al-Jahm bin Safwan dari Khurasan. Fahaman ini menyatakan manusia tidak mempunyai sebarang usaha atau kasab, semuanya dipaksakan ke atasnya oleh Tuhannya. Apabila mereka melakukan dosa, mereka berkata: Kita ini hanya umpama bulu atau ranting kayu, ke mana ditiup angin, ke sanalah kita akan pergi (Said Ibrahim, 1997).

Kemunculan Mushabbihah, Mujassimmah dan Hashwiyyah

Ajaran Tajsim dan Tashbih pada asalnya telah merosakkan golongan Yahudi dan Nasrani. Dan fahaman ini juga mula meresap ke dalam sebahagian umat Islam melalui beberapa kelompok. Imam Fakhr al-Din al-Razi menyebut: Golongan Mushabbihah itu dua golongan. Pertama, mereka adalah golongan Rafidah daripada Syiah, dan kedua mereka adalah Hashwiyyah daripada ahli hadith yang berpegang dengan makna zahir hadith mutashabihat yang memberi sangkaan Tashbih.

Golongan pertama adalah seperti Hisham Ibn al-Hakam (al-Hishamiyyah) dan kelompok kedua adalah seperti Abdullah Bin Muhammad Bin Kullab/Kilab. Menurut Imam Taqiyy al-Din al-Hisni, pada akhir kurun pertama telah muncul seorang bernama al-Mughirah bin Sa'd yang merupakan seorang ahli sihir. Dia menghimpunkan di antara ajaran ilhad dan tajsim. Dia menyatakan bahawa Tuhannya itu berupa manusia yang mempunyai mahkota di atas kepalanya, anggotanya sebanyak huruj hija'iyah. Dia juga mentafsirkan al-Qur'an dengan tujuan mencela Saidina Abu Bakr r.a. dan Saidina 'Umar r.a. Dia juga mengkafirkan seluruh para sahabat kecuali yang teguh bersama Saidina 'Ali r.a. (Taqiyy al-Din al-Hisni, 2003). Di antara kelompok Mushabbihah yang awal ialah Karramiyyah, Hishamiyyah, Mughiriyyah dan lain-lain.

Fitnah Muktazilah (Al-Wasiliyyah)

Fahaman Muktazilah mula muncul sebagai mazhab pemikiran pada zaman Wasil bin 'Ata'. Namun begitu, kandungan pemikirannya boleh dikaitkan lebih awal lagi dengan al-Ja'd bin Dirham dan muridnya Jahm bin Safwan serta Ma'bad al-Juhani dan muridnya Ghaylan al-Dimashqi al-Qadari.

Wasil bin 'Ata' pada asalnya adalah merupakan murid kepada Imam al-Hasan al-Basri. Dia kemudian meminggirkan dirinya daripada majlis Imam al-Hasan al-Basri setelah dia menyuarakan pandangannya bahawa pelaku dosa besar itu berada di antara dua kedudukan dan ia akan kekal di dalam neraka jika tidak bertaubat sebelum mati. Dia hidup pada zaman Khilafah 'Abd al-Malik ibn Marwan dan Hisham bin 'Abd al-Malik. Fitnah Muktazilah mula muncul pada akhir zaman Khilafah Umawiyyah dan bertambah kuat pada Khilafah 'Abbasiyyah dengan sokongan daripada sebahagian pemerintahnya.

Fitnah “Kalam” (*Mihnah Khalq al-Qur’an*) oleh Muktazilah

Di antara fitnah terbesar yang pernah melanda umat Islam ialah fitnah “Khalq al-Qur’an” yang dibawa oleh golongan Muktazilah. Para pemerintah yang terpengaruh dengan doktrin ini mula mewajibkan agar umat Islam menerima doktrin mereka bahawa “Al-Qur’an adalah makhluk.” Umat Islam, khususnya para ulama’ yang tidak menerima doktrin ini dituduh sebagai kafir dan ditangkap, dipenjaran, diseksa dan dibunuh. Fitnah ini melanda umat Islam bermula pada akhir Khilafah Al-Ma’mun (198H-218H), iaitu pada tahun 218H. Ia berlanjutan sekitar 15 tahun di bawah zaman pemerintahan Khalifah Ma’mun, Khalifah al-Mu’tasim billah (218H-227H), dan Khalifah Al-Wathiq billah (227H-232H).

Keteguhan Imam Ahmad Bin Hanbal

Dalam menghadapi fitnah besar kaum Muktazilah yang didukung oleh beberapa pemerintah Bani ‘Abbasiyyah yang mewajibkan umat dan ulama’ Islam menerima aqidah sesat “Al-Qur’an (Kalamullah) adalah makhluk”, Imam Ahmad Bin Hanbal telah berdiri teguh selama belasan tahun. Beliau telah dipenjara sekitar dua tahun setengah, diseksa dan disebat dengan cemeti pada era al-Mu’tasim selepas kewafatan al-Ma’mun. Kemudian, beliau dibenarkan pulang ke rumahnya dan kekal di rumah sepanjang pemerintahan al-Mu’tasim dan al-Wathiq.

Manhaj Imam Ahmad Bin Hanbal juga dikenali sebagai manhaj Al-Athari. Ia adalah manhaj yang banyak bergantung dan berpegang dengan aspek naqli. Manhaj Athari tidak menolak takwil tafsili secara total kerana Imam Ahmad Bin Hanbal sendiri dinukilkan melakukan takwil tafsili bagi beberapa nas mutashabihat berkenaan *maji’* dan lain-lain. Tetapi manhaj ini menggunakan kaedah takwil tafsili dengan kadar yang sangat minimum.

Khalifah Al-Mutawakkil Pada 232H Memadam Fitnah Khalq Al-Qur’an

Fitnah Khalq Al-Qur’an mula beransur hilang dengan kemunculan Khalifah Al-Mutawakkil (Ja’far) bin Al-Mu’tasim bin Harun al-Rashid. Beliau adalah Khalifah ‘Abbasiyyah yang kesepuluh dan ke-19 bagi umat Islam. Beliau adalah Khalifah ‘Abbasiyyah pertama yang berpegang dengan mazhab Shafie. Beliau dibay’ah menjadi Khalifah pada bulan Zul Hijjah 232H.

Beliau telah menukar jawatan-jawatan agama dari dominasi golongan Muktazilah kepada ulama' ASWJ.

Kemunculan Najjariyyah

Najjariyyah adalah pengikut al-Husayn bin Muhammad bin Abdullah al-Najjar yang wafat pada 220H. Dia hidup pada pemerintahan al-Ma'mun di sekitar tahun 198H sehingga 218H. Pada awalnya, dia adalah murid kepada seorang Muktazilah yang bernama Bishr al-Muraysi. Aqidahnya sering berubah-ubah pada awalnya sehinggalah dia membina mazhabnya sendiri. Najjariyyah menyatakan iman itu bertambah dan tidak berkurangan; Allah berada di setiap tempat dengan zatnya; Allah tidak mempunyai sifat ma'ani; kalam Allah itu makhluk dan manusia itu dipaksa dan tidak mempunyai pilihan dan kekuatan. Tiga kelompok utama Najjariyyah kepada al-Burghuthiyyah, al-Za'faraniyyah dan al-Mustadrikah. Setiap pecahan mereka ini saling kafir mengkafirkan.

Kemunculan Karramiyyah Dan Fitnahnya Melanda Mazhab Hanbali (w.255h)

Ajaran Karramiyyah mula muncul pada separuh pertama daripada kurun ke-3 Hijrah. Karramiyyah adalah sebuah mazhab Tajsim yang diasaskan oleh Muhammad Bin Karram al-Sajistani (MKS), juga dikenali sebagai Ibnu Karram. Ibnu Karram sempat hidup di zaman Imam Ahmad dan Imam Sufyan bin 'Uyaynah. Beliau berlakun sebagai salah seorang pengikut mazhab Imam Ahmad sehingga dinilai sebagai Thiqah oleh Sufyan bin 'Uyaynah. Namun, setelah kewafatan Imam Ahmad pada tahun 241H, Ibnu Karram mula menyebarkan fahaman Tajsim dan Tashbih di kalangan pengikut Imam Ahmad sehingga mazhab Imam Ahmad terjejas dengan fitnah ini (Taqiyy al-Din al-Hisni, 2003).

Dia dan pengikutnya menggunakan helah dengan menzahirkan kesungguhan mendengar hadith. Mereka banyak menyebut hadith-hadith mutashabihat dan menghimpunkannya serta membacakannya kepada masyarakat awam. Sebahagian ulama' yang mula sedar tentang muslihatnya mula berusaha sehingga dia dipenjarakan selama lapan tahun. Kemudian, para pengikutnya berjaya mengeluarkannya dari penjara dan dia kemudiannya pergi ke Syam dan akhirnya meninggal di sana. Para pengikutnya menzahirkan diri mereka dengan banyak beribadah dan zuhud.

Dan sehingga munculnya golongan Hanabilah yang dipanggil oleh ulama' sebagai Hanabilah Mujassimah atau Hashwiyyah. Pengasas Karramiyyah ini juga telah menyebabkan penyerapan fitnah Tajsim ke dalam mazhab Hanbali. Ibnu Karram wafat pada tahun 255H.

Fitnah ini telah menjejaskan reputasi mazhab Hanbali dengan teruk. Hakikat ini telah disebut oleh salah seorang tokoh besar mazhab Hanbali iaitu al-Imam al-Hafiz Ibn al-Jawzi al-Hanbali (w597H) di dalam kitab beliau "*Daf' Shubah al-Tashbih bi Akaff al-Tanzih*" [Menolak Shubhat-shubhat Aqidah Tashbih dengan Sekuat-kuat Aqidah Tanzih]. Beliau menyebut (ms.10):

لَقَدْ كَسَيْتُمْ هَذَا الْمَذْهَبَ شَيْئًا قَبِيحًا، حَتَّى صَارَ لَا يُقَالُ عَنْ حَنْبَلٍ إِلَّا مُجَسِّمٌ

"Sesungguhnya kamu (wahai Hanabilah Mujassimah) telah memakaikan mazhab (Hanbali) ini dengan pakaian (reputasi) yang sangat jijik/kotor, sehingga tidak disebut tentang seorang yang bermazhab Hanbali melainkan sebagai *mujassim* (menjisimkan tuhan)."

Al-Imam Taj al-Din al-Subki (w771H) menyebut di dalam kitabnya "*Qā'idah fī al-Jarh wa al-Ta'dīl*":

قال بعض العارفين - ورأيته بخط الشيخ تقي الدين بن الصلاح : إمامان ابتلاههما الله بأصحابهما وهما بريئان منهم: أحمد بن حنبل ابتلي بالمجسمة، وجعفر الصادق ابتلي بالرافضة.

"Sebahagian para *'arifin* telah berkata – dan saya telah melihatnya dengan tulisan (Imam) Taqiyy al-Dīn Ibn al-Ṣalāḥ -:

Dua orang Imam yang telah diuji/diibtila'kan oleh Allah dengan (sebahagian) para pengikut mereka berdua, sedangkan mereka berdua bebas daripada (dakwaan) mereka:

[1] (Imam) Aḥmad Ibn Ḥanbal diuji dengan golongan *Mujassimah* (golongan yang menyifatkan Allah dengan sifat jisim seperti arah, tempat, saiz, suara, anggota, bergerak, berpindah dan lain-lain);

[2] dan (Imam) Ja'far al-Ṣādiq diuji dengan kaum Rafidah (kaum Syiah ekstrim yang menolak/ mencaci para Sahabat Rasulullah ﷺ)."

KELAHIRAN MADRASAH KULLABIYYAH DAN AL-MUHASIBIYYAH SEBELUM DUA TOKOH BESAR ASWJ

Para ulama' mengambil pelbagai pendekatan dalam mendepani golongan bid'ah. Secara umumnya, mereka menolak golongan ini, menyatakan kebatilan fahaman mereka, menghalau mereka dari majlis dan menasihatkan masyarakat awam agar menjauhkan diri daripada mereka.

Sebahagian para ulama' telah bangkit untuk berdebat dan menolak kesesatan golongan ini seperti Saidina 'Abdullah bin 'Abbas r.a. yang berdebat dengan kelompok Khawarij Haruriyyah sehingga sebahagian daripada mereka kembali bertaubat. Imam Abu Hanifah juga mengambil pendekatan berdebat dengan ahli-ahli bid'ah dari kalangan Qadariyyah.

Latar belakang Imam Ibnu al-Kullab (241H)

Di antara ulama' yang bangkit menentang golongan batil dengan hujah naqli dan aqli ialah Imam Ibn Kullab. Beliau ialah Abu Muhammad 'Abdullah bin Sa'id bin Kullab al-Qattan al-Basri. Beliau juga dikenali sebagai qudama' Al-Asha'irah kerana telah menggunakan hujah aqli dan naqli dalam mengkritik kelompok-kelompok bid'ah seperti golongan Muktazilah, Qadariyyah, Hashwiyyah, Mujassimah dan lain-lain. Beliau dikatakan wafat pada tahun 241H.

Latar belakang Imam Harith al-Muhasibi (170H-243H)

Di antara ulama' Salafus Soleh yang bangkit menentang kelompok ahli bid'ah yang muncul menggunakan hujah-hujah aqli dan naqli ialah Imam Al-Harith Al-Muhasibi. Nama penuh beliau ialah Al-Harith bin Asad bin Abdullah al-Muhasibi al-Basri. Kunyah beliau ialah Abu 'Abdillah dan beliau dikenali sebagai al-Muhasibi kerana beliau sering memuhasabah diri beliau. Beliau berasal dari Basrah dan dilahirkan pada tahun 170H dan wafat di Baghdad pada tahun 243H. Beliau adalah seorang tokoh di dalam ilmu Tasawwuf, Fiqh dan Kalam (Aqidah). Di dalam bidang aqidah, beliau telah bangkit menentang golongan Muktazilah dan Rafidah. Beliau juga dikenali sebagai qudama' Al-Asha'irah.

KEMUNCULAN DUA TOKOH BESAR ASWJ

Kemunculan Imam Abu al-Hasan al-Ash'ari (260H – 324H) Sebagai Imam Ahli Sunnah dan Jama'ah

Imam Abu al-Hasan al-Ash'ari ialah salah satu tokoh terpenting dalam mempertahankan ASWJ di waktu umat Islam berhadapan dengan pelbagai fitnah daripada pelbagai kelompok yang menyeleweng. Pada awalnya beliau dikatakan terpengaruh dengan pandangan Muktaizilah melalui bapa tirinya Abu 'Ali al-Juba'i. Kemudian beliau mengisytiharkan taubat beliau dan bangun mempertahankan dan memperjelaskan aqidah ASWJ sehingga beliau digelar “Nasir al-Din”, “Nasir al-Sunnah”, “Imam al-Mutakallimin” dan “Imam Ahl al-Sunnah wa al-Jama'ah.” Beliau mengisytiharkan taubat ketika beliau berumur 40 tahun iaitu pada tahun 300 Hijrah dan seterusnya beliau berjuang menegakkan aqidah ASWJ sehingga beliau wafat pada tahun 324 H. Pada hari kewafatan beliau, disebut:

اليوم مات ناصر السنة

“Pada hari ini, telah wafat “Pendukung Sunnah”.”

Beliau disebut telah mengarang hampir 300 buah mengikut perkiraan al-Hafiz Ibn 'Asakir. Namun, tidak banyak yang sampai kepada kita dan diterbitkan. Beliau bangkit berdebat dan mengkritik golongan Muktaizilah, Mujassimah, Hashwiyyah, Mulhidin dan lain-lain. Namun begitu, beliau jelas jauh dari bersikap takfir kepada ahli qiblah.

Kemunculan Imam Abu Mansur al-Maturidi al-Ansari (233-247H – 333H) Sebagai Imam Ahli Sunnah dan Jama'ah

Imam Abu Mansur al-Maturidi juga adalah amat sinonim dengan Imam Abu al-Hasan al-Ash'ari sebagai Imam Ahli Sunnah dan Jama'ah. Nasab keturunannya bersambung sehingga kepada Saidina Abu Ayyub Al-Ansari r.a.. Beliau menurut manhaj Imam Abu Hanifah dan mengembangkannya. Oleh kerana itulah majoriti ulama' Hanafiyyah berpegang dengan Maturidiyyah di dalam aqidah. Beliau digelar sebagai “Imam al-Huda”, “Alam al-Huda”, “Imam al-Mutakallimin”, “Musahhah 'Aqa'id al-Muslimin”, “Ra'is Ahl al-Sunnah”, “Qudwah Ahl al-Sunnah wa al-Ihtida”,

“Rafi’ A’lam al-Sunnah wa al-Jama’ah”, “Qali’ Adalil al-Fitnah wa al-Bid’ah” dan “Shayk al-Islam”.

Gelaran Imam Ahli Sunnah dan Jama’ah diberikan kepada kedua-dua tokoh ini oleh para ulama’ kerana mereka berdua bukan sahaja menerangkan aqidah yang benar, tetapi mereka juga menerangkan kebatilan aqidah yang batil, menolak syubhat-syuhbat yang ditimbulkan ahli bid’ah, berdebat dengan mereka sehingga zahirnya kebatilan aqidah mereka. Mereka juga menggabungkan dalil-dalil aqli dan naqli serta mengambil pendekatan perdebatan dan penulisan sehingga hancurnya fitnah-fitnah ini. Oleh kerana usaha mereka berdua yang signifikan di dalam perkara ini serta penerimaan manhaj mereka oleh majoriti para ulama’ selepas mereka, maka istilah ASWJ merujuk kepada mereka berdua secara khusus.

Salah seorang daripada dua tunggak dan pentahqiq mazhab Shafie pada era *istiqrār* (peringkat keteguhan) mazhab Shafie iaitu al-Imam Shaykh al-Islam Shihab al-Din Ibn Hajar al-Haytami al-Makki (w.974H) menyebut di dalam *al-Zawājir ‘an Iqtirāf al-Kabā’ir* (p: 82) berkata:

المراد بالسنة: ما عليه إماما أهل السنة والجماعة الشيخ أبو الحسن الأشعري وأبو منصور الماتريدي

“Maksud yang dikehendaki dengan (ahli) Sunnah (dan Jama’ah) adalah akidah yang dipegang oleh dua orang Imam Ahli Sunnah dan Jama’ah iaitu: (i) (al-Imam) al-Shaykh Abu al-Hasan al-Ash’ari dan (i) (al-Imam al-Shaykh) Abu Mansur al-Maturidi.”

Dan kemudian beliau menyatakan di dalam kitab yang sama dan di dalam kitabnya yang lain iaitu “*al-Ta’arruf fi al-Aslayn wa al-Tasawwuf*”:

مَنْ خَالَفَهُمَا فَهُوَ مُبْتَدِعٌ

“Barangsiapa yang menyalahi mereka berdua (al-Imam Abu al-Hasan al-Ash’ari dan al-Imam Abu Mansur al-Maturidi), maka dia adalah seorang ahli bid’ah.”

ULAMA' EMPAT MAZHAB FIQH UTAMA SUNNI DAN TOKOH ULAMA' DALAM SEGENAP BIDANG SEBAGAI KESINAMBUNGAN MANHAJ ASWJ AL-ASHA'IRAH DAN AL-MATURIDIYYAH

Manhaj Imam Abu al-Hasan al-Ash'ari dan Imam Abu Mansur al-Maturidi kemudiannya telah didukung oleh para ulama' besar selepas mereka dan tersebar ke seluruh dunia Islam. Jadual di bawah menyenaraikan sebahagian para ulama' yang utama bagi perkembangan kedua-dua mazhab ASWJ ini.

Asha'irah	Maturidiyyah
Al-Imam Abu Bakr al-Qaffal (w.365H)	Al-Imam al-Bazdawi (w.478H)
Al-Imam Abu al-Hasan al-Tabari (w.380H)	Al-Imam Abu al-Mu'in al-Nasafi (w.502H)
Al-Imam al-Qadi Abu Bakr al-Baqillani (w.403H)	Al-Imam Najm al-Din al-Nasafi (w.537)
Al-Imam Ibn Furak (w.406H)	Al-Imam Sa'd al-Din al-Taftazani
Al-Imam Abd al-Qahir al-Baghdadi (w.429H)	Al-Imam Al-Kamal ibn al-Hummam (w.861H)
Al-Imam Qushayri (w.465H)	Al-'Allamah Kamal al-Din Ahmad al-Bayadi
Al-Imam Abu Ishaq al-Shirazi (w.476H)	Al-Shayk Al-'Allamah Muhammad Zahid al-Kawthari
Al-Imam Abu Ishaq al-Isfarayini (w.418H)	Madrasah Deobandi
Imam al-Haramayn Abu al-Ma'ali al-Juwayni (w.419H)	
Al-Imam Hujjat al-Islam Abu Hamid Muhammad al-Ghazali (w.505H)	
Al-Imam Fakhr al-Din al-Razi (w.544H)	
Al-Imam Sultan al-'Ulama' 'Izz al-Din bin 'Abd al-Salam (w.660H)	

Bahkan sebahagian pemerintah Islam juga mengambil peranan dalam penyebaran mazhab ASWJ Al-Asha'irah dan Al-Maturidyyah seperti Ibn Tumart, Nur al-Din al-Zinki dan Salahuddin al-Ayyubi. Begitu, institusi-institusi ilmu penting dalam sejarah umat Islam seperti Madrasah Nizamiyyah, Dar al-Hadith al-Ashrafiyyah, Universiti Al-Azhar, Universiti

Qurawiyyin, Universiti Zaytunah, Madrasah Deoband dan lain-lain telah menyumbang kepada penyebarannya.

Al-‘Asha’irah adalah Ilmuan Islam Sepanjang Zaman dalam Segenap Bidang Ilmu Islam

Mazhab ASWJ Al-Asha’irah dan Al-Maturidiyyah juga didukung oleh para ulama’ Islam dalam segenap bidang. Al-Imam al-‘Allamah al-Faqih al-Sufi Shaykh al-Islam Qutb al-Da’wah wa al-Irshad Abdullah Bin ‘Alawi al-Haddad (1044 - 1132H) berkata di dalam kitabnya “*Nayl al-Maram Sharh ‘Aqidat al-Islam*”, p.8:

(اعلم أن مذهب الأشاعرة في الاعتقاد هو ما كان عليه جماهير
أمة الإسلام علماؤها ودهماؤها، إذ المنتسبون إليهم والسالكون
طريقهم كانوا أئمة أهل العلوم قاطبة على مرّ الأيام والسنين، وهم
أئمة علم التوحيد والكلام والتفسير والقراءة والفقه وأصوله والحديث
وفنونه والتصوف واللغة والتاريخ) اهـ.

“Ketahuilah olehmu bahawa sesungguhnya mazhab al-Asha’irah di dalam aqidah adalah merupakan pegangan majoriti umat Islam dari kalangan ulama’nya dan awamnya, lantaran orang-orang yang menisbahkan diri mereka kepadanya dan berjalan di atas jalanya adalah merupakan para ilmuan Islam keseluruhannya sepanjang zaman – dan mereka adalah para Imam di dalam ilmu Tauhid, Kalam, Tafsir, Qira’at al-Qur’an, Fiqh, Usul al-Fiqh, Hadith dan seni-seninya, Tasawwuf, Lughah (Bahasa Arab) dan Sejarah.”

Al-Ashairah dan al-Maturidiah adalah Jaguh Para Ulama’ dalam Semua Disiplin Ilmu-ilmu Islam

Al-Shaykh Dr. Nuh ‘Ali Salman al-Qudah – Qadi al-Qudah (Ketua Hakim) dan Mufti Jordan yang paling berpengaruh dalam sejarahnya serta tokoh sarjana Muslim yang sangat disegani di Jordan menyebut :

ومن الجدير بالذكر أن جهازة علماء المسلمين من محدثين ومفسرين
وفقهاء وأصوليين ومتكلمين هم من الأشاعرة والماتريدية، فالمالكية
والشافعية وكثير من الحنابلة - كابن الجوزي - أشاعرة، والحنفية ماتريدية،
فماذا يقول يوم القيامة من سب هؤلاء وشتهم وهو عال عليهم في بقية
علوم الشريعة؟

“Dan di antara perkara yang patut disebut ialah jaguh-jaguh ulama’ Muslimin daripada ulama’ hadith, ulama’ tafsir, ulama’ fiqh, ulama’ usul fiqh dan ulama’ aqidah: mereka adalah daripada **Al-Asha’irah dan Al-Maturidiah**. Ulama’ mazhab Maliki, ulama’ mazhab Shafie dan ramai daripada ulama’ mazhab Hanbali – seperti Ibn al-Jawzi – adalah **Asha’irah** dan ulama’ mazhab Hanafi adalah **Maturidiah**.

Maka apakah yang akan dikatakan oleh golongan yang mencaci dan mencela mereka pada Hari Kiamat kelak, sedangkan dalam masa yang sama golongan tersebut bergantung kepada mereka (**Al-Asha’irah & Al-Maturidiah**) dalam ilmu-ilmu Shariah yang lain?...”

(al-Qudah, 1999), pp.9-10.

Ulama’ Empat Mazhab adalah ASWJ Al-Asha’irah dan Al-Maturiddiyah

Kedudukan al-Asha’irah sebagai majoriti ulama’ umat Islam khususnya majoriti ulama’ empat mazhab adalah amat diketahui dan diperakui kawan dan lawan. Tiada yang meragui hakikat ini melainkan seorang yang taksub atau jahil. Al-Shaykh Prof. Dr. Muhammad Hasan Hitou menyebut:

“Maka ulama’ mazhab Maliki kesemuanya adalah Asha’irah, dan ulama’ mazhab Shafi’ie kesemuanya adalah Asha’irah, dan ulama’ mazhab Hanafi kesemuanya adalah Asha’irah atau Maturidiyyah dan tidak ada perbezaan di antara mereka (pada hakikatnya), dan sebahagian besar daripada para imam dari kalangan ulama’ mazhab Hanbali yang terdahulu adalah dari kalangan Asha’irah.

Dan ini adalah secara umum.”

(al-Sinan & al-’Anjari, 2006), Bahagian Muqaddimah, p.7.

Siapakah Ahli Sunnah dan Jama'ah kalau bukan Al-Asha'irah dan Al-Maturidiyyah?

Al-Shaykh Prof. Dr. Muhammad Hasan Hito seterusnya menyebut p.7:

“Manakala secara terperinci pula (berkenaan ASWJ), maka tokoh-tokoh besar umat Nabi Muhammad ﷺ adalah terdiri daripada ulama' Al-Asha'irah – seperti al-Baqillani, al-Qushayri, Abu Ishaq al-Shirazi, Abu al-Wafa' Bin 'Aqil al-Hanbali, Abu Muhammad al-Juwayni, dan anaknya Abu al-Ma'ali Imam al-Haramayn, Hujjat al-Islam al-Ghazali, Al-Qadi Abu Bakr Bin al-'Arabi, Fakhr al-Din al-Razi, Ibnu 'Asakir, Al-'Izz Bin 'Abd al-Salam, anak-anak al-Athir, al-Rafi'i, al-Nawawi, al-Subki dan anak-anaknya, al-Mizzi, al-'Iraqi, Ibn Hajar al-'Asqalani, Ibn Hajar al-Haytami, al-Suyuti, dan sebilangan besar yang tidak terhitung, nafas tidak akan terputus dan kertas tidak akan mencukupi untuk menulis mereka satu-persatu.

Dan sekiranya setiap daripada mereka yang telah kami sebutkan, dan berganda-ganda banyaknya lagi yang tidak kami sebut, bukanlah daripada Ahli Sunnah dan Jama'ah¹, maka siapakan Ahli Sunnah dan Jama'ah dalam sejarah [umat Islam]??!!

(al-Sinan & al-'Anjari, 2006), Bahagian Muqaddimah, p.7.

KESINAMBUNGAN MANHAJ ASWJ DI MALAYSIA

Wasiat Syeikh Abdullah Fahim bin Syeikh Ibrahim (1869M – 1961M) Berkenaan Manhaj ASWJ di Malaysia

بِسْمِ اللَّهِ الرَّحْمَنِ الرَّحِيمِ

الحمد لله والصلاة والسلام على سيدنا محمد وعلى آله وأصحابه، (أما بعد):

“Tuan-tuan sedia maklum beratus-ratus tahun bahawa orang bangsa Melayu seMalaya ini dari peringkat ke bawah hingga ke peringkat ke atas, awam-awam, qadhi-qadhi, ulama'-ulama', menteri-menteri hingga raja-raja sekalian mereka itu bermazhab dengan mazhab al-Imām al-Shāfi'i

¹ Seperti yang sering dituduh dan didakwa oleh golongan Wahhabi.

ijmā'an, tiada seorang pun yang bermazhab lain daripada mazhab Shāfi'i (يَحْرُمُ خَرْقُ الْإِجْمَاعِ) "haram hukumnya mencarik/ merobek ijma'".

Ambil mereka itu hukum-hukum fiqh Shāfi'i daripada kitab Tuḥfah dan kitab Nihāyah hingga kitab al-Umm dan mukhtaṣarātnya dan terjemahnya kepada bahasa Melayu seperti Sabīl al-Muhtadīn, Bughyat al-Ṭullāb dan Maṭla' al-Badrayn dan lainnya.

Usuluddin atas perjalanan Abu al-Hasan al-Ash'ari, diambilkan daripada shurūḥ dan hawāshī Umm al-Barāhīn dan Jawharah dan sebagainya daripada kitab-kitab Melayu.

Ilmu Tasawwuf atas perjalanan al-Imām al-Ghazālī, diambilkan daripada Minhāj al-Ābidīn, Ihyā' 'Ulūm al-Dīn dan terjemahnya kepada Melayu seperti Siyar/Sayr al-Sālikīn.

Maka ini kitab-kitab dan seumpamanya segala hukum dalamnya kesemua mustanbat daripada Qur'an dan Hadith yang dihalusi dan ditapis oleh **ulama' ajillā'** (ulama yang cemerlang lagi terbilang), diamal dengan dia sudah **lebih daripada seribu (1000) tahun** dan diterjemah kepada bahasa Melayu **beratus-ratus tahun.**"

Tan Sri Dato' Haji Othman Bin Mustapha– Ketua Pengarah JAKIM

Ketua Pengarah JAKIM (24 April 2011 - 16 Mei 2018), Tan Sri Dato' Othman Mustapha juga ada menerangkan berkenaan definisi dan kerangka Ahli Sunnah dan Jama'ah yang menjadi asas penghayatan agama Islam di Malaysia. Pada tahun 2013, beliau menyebut:

“Anutan Ahli Sunnah Wal Jamaah yang menjadi tradisi di Malaysia [dari sudut fiqh] merujuk kepada pengikut mazhab **Syafieyah** dan **dari segi teologinya [aqidah] beraliran Asya'irah** tanpa menolak tiga mazhab lain yang muktabar. Dari segi akhlak atau rohaniyahnya [Tasawwuf] dipengaruhi oleh pandangan **Imam Al-Ghazali**.”

R: Dato Othman Mustapha, Ketua Pengarah JAKIM, Berita Harian, Ahad, 13 Disember 2013, m/s 30-31.

Jawatankuasa Fatwa Negeri Sembilan (2016)

“Setelah meneliti setiap pandangan ahli mesyuarat dan hujah-hujah yang dikemukakan, Muzakarah Jawatankuasa Fatwa Negeri Sembilan Bil. 02/2016-1437H yang bersidang pada 25 Februari 2016 bersamaan 16 Jamadilawal 1437H telah bersetuju menerima cadangan takrifan berkaitan Ahli Sunnah Wal Jamaah dalam konteks Negeri Sembilan iaitu merujuk kepada kelompok majoriti umat Islam mereka yang berpegang dengan ajaran Islam yang sebenar berdasarkan al-Quran dan panduan Nabi Muhammad SAW, para sahabat dan para ulama Islam muktabar serta berpegang dalam hal berkaitan dengan:

1. **Aqidah dan Tauhid**, berdasarkan pegangan Imam Abu Hasan al-Ash’ari dan Imam Abu Mansur al-Maturidi.
2. **Fiqh dan Syariah**, berdasarkan **mazhab Shafii** di samping meraikan mazhab Hanafi, Maliki dan Hanbali.
3. **Tasawwuf**, berdasarkan manhaj ulama sufi berwibawa seperti Imam Junaid al-Baghdadi dan Imam al-Ghazali.”

Rujukan: Laman Sesawang JMKNS. Tarikh akses: Ahad, 08 Mei 2016.

RUMUSAN

1. Kemunculan mazhab ASWJ adalah rentetan respon para ulama’ Islam yang berkaliber dan berautoriti kepada kemunculan golongan-golongan yang menyeleweng daripada manhaj yang dibawa oleh Rasulullah ﷺ dan para Sahabat Baginda.
2. Perpecahan umat Islam diperingkat awal bermula dengan isu politik atau isu pemilihan Khalifah atau Imam. Kemudian ia berkembang menjadi perpecahan aqidah melibatkan perbahasan ketuhanan dan sebagainya.
3. Aliran bid’ah yang disokong oleh kuasa pemerintahan akan membawa fitnah yang besar kepada umat Islam.
4. Pihak pemerintah perlu memastikan bahawa para ulama’ yang menjadi rujukan mereka adalah para ulama’ yang jelas berpegang dengan manhaj ASWJ.

5. Kerjasama di antara golongan umara' dan ulama' Ahli Sunnah dan Jama'ah adalah asas bagi keamanan umat Islam kerana ASWJ jauh daripada sikap-sikap ekstrim khususnya sikap Takfir dan Istihlal (menghalalkan darah dan harta umat Islam yang lain).
6. Penamaan atau istilah Ahli Sunnah dan Jama'ah (ASWJ) adalah penting bagi: (i) membezakan golongan yang hak dan batil di kalangan umat Islam; (ii) menjadi syiar kebenaran dan (iii) panduan yang jelas bagi masyarakat Islam dalam beragama.
7. Al-Ashair'ah dan Al-Maturidiyyah adalah dua mazhab ASWJ di dalam Aqidah yang mempertahankan dan memperjelaskan aqidah yang dibawa oleh Rasulullah ﷺ dan para Sahabat. Ia adalah mazhab majoriti ulama' dan umat Islam sejak dahulu sehingga kini. Makna al-Jama'ah dan al-Sawad al-A'zam sangat jelas pada sejarah perkembangan mereka sehingga ke hari ini. Merekalah mazhab para ulama' fiqh, ulama' tafsir, ulama' hadith, ulama' tasawwuf dan lain-lain. Dan inilah manhaj ASWJ bagi umat Islam di Malaysia dalam pengajian dan pengajaran aqidah.

BIBLIOGRAFI

- 'Abdullah Hasan Basha. *Sidq al-Khabar fi Khawarij al-Qarn al-Thani 'Ashar*. al-Ladhiqiyyah: Matba'ah Karamayn.
- Abū Dāwud, Sulaymān al-Sijistānī. (2010). *Sunan Abī Dāwud*. Bayrūt: Dār al-Kutub al-'Ilmiyyah.
- Aḥmad, Ibn Ḥanbal. (1995). *al-Musnad*. 'Ammān: Mu'assasat al-Risālah.
- al-Bazzār, Abū Bakr. (1997). *al-Baḥr al-Zakhkhār bi Musnad al-Bazzār*. al-Madīnah al-Munawwarah: Maktabat al-'Ulūm wa al-Ḥikam.
- al-Bukhārī, Muḥammad Ismā'īl. (1999). *Ṣaḥīḥ al-Bukhārī*. al-Riyād: Dar al-Salām.
- al-Bukhārī, Muḥammad Ismā'īl. (2001). *al-Tārīkh al-Kabīr*. Bayrut: Dar al-Kutub al-'Ilmiyyah.
- al-Būṣīrī. (1998). *Iḥāf al-Khiyarah al-Maharah bi Zawā'id al-Masānīd al-'Asharah*. al-Riyad: al-Rushd.
- al-Buti, Muhammad Sa'id Ramadan (1991). *Fiqh al-Sirah al-Nabawiyah ma'a Mujaz li Tarikh al-Khilafah al-Rashidah*. Dimashq: Dar al-Fikr.
- al-Dhahabi, Muhammad Ahmad (1992). *Siyar A'lam al-Nubala'*. Bayrut: Mu'assasat al-Risalah.

- al-Nasā'ī, Aḥmad Shu'ayb. (1986a). *al-Sunan al-Kubrā*. Bayrūt: Dār al-Kutub al-'Ilmiyyah.
- al-Nasā'ī, Aḥmad Shu'ayb. (1986b). *al-Sunan al-Sughrā / al-Mujtabā min al-Sunan*. Ḥalab: Maktab al-Matbū'āt al-Islāmiyyah.
- al-Qudah, Nuh 'Ali Salman. (1999). *al-Mukhtasar al-Mufid fi Sharh Jawharat al-Tawhid*. 'Amman: Dar al-Razi.
- al-Sinan, Hamd, & al-'Anjari, Fawzi. (2006). *Ahl al-Sunnah al-Asha'irah: Shahadat 'Ulama' al-Ummah wa Adillatuhum*. Kuwayt: Dar al-Diya'.
- al-Tirmidhī, Muḥammad 'Isā. *al-Jāmi' al-Kabīr (Sunan al-Tirmidhī)*. al-Riyād: Maktabat al-Ma'ārif li al-Nashr wa al-Tawzī'.
- Fatwa Johor. (2015). Ancaman Aliran Bukan Ahli Sunnah Wal Jamaah Terhadap Perpaduan Umat Islam Malaysia. Retrieved from e-smaf.islam.gov.my/e-smaf/index.php/main/mainv1/fatwa/pr/15888
- Ibn Ḥajar al-'Asqalānī, Aḥmad 'Alī. (1998). *al-Maṭālib al-'Āliyah bi Zawā'id al-Masānid al-Thamāniyah*. al-'Āshimah al-Ghayth: al-Mamlakah al-'Arabiyyah al-Sa'ūdiyyah.
- Ibn Ḥibbān, Muḥammad. (1993). *Ṣaḥīḥ Ibn Ḥibbān*. Bayrūt: Mu'assasat al-Risālah.
- Ibn Kathir, Isma'il 'Umar. (1988). *al-Bidayah wa al-Nihayah*: Dar Ihya' al-Turath al-'Arabi.
- Jalil, Abdullaah. (2018, 27 Oktober). *Sumbangan Ilmuan Fiqah dalam Pemikiran Al-Ash'ariyyah*. Paper presented at the Seminar Kebangsaan Asyairah Ahli Sunah Waljamaah 2.0, Kompleks Tun Abdullah Mohd Salleh (43.101), Universiti Kebangsaan Malaysia.
- Muslim, Ibn al-Ḥajjāj. (2006). *al-Jāmi' al-Ṣaḥīḥ / Ṣaḥīḥ Muslim*. al-Riyād: Dār Ṭaybah.
- Pusat Fatwa Jordan. (2012). الأشاعرة هم جمهور أهل السنة والجماعة. Retrieved from <https://aliftaa.jo/Question.aspx?QuestionId=489>
- Said Ibrahim. (1997). *Perbandingan Aqidah dan Fahaman Umat Islam (Jawi)*. Kuala Lumpur: Dar al-Ma'rifah.
- Taj al-Din al-Subki, 'Abd al-Wahhab. (2003). *Tabaqat al-Shafi'iyyah al-Kubra*. Hijr li al-Tiba'ah wa al-Nashr wa al-Tawzi': al-Qahirah.
- Taqiyy al-Din al-Hisni. (2003). *Daf' Shubah Man Shabbah wa Tamarrad wa Nasab Dhalik ila al-Imam Ahmad Ibn Hanbal*: Dar al-Mustafa.